

## Vieftigmaol Dialektdag.

Op zaoterdag 25 oktober vergangen worden in Brevoort in 't Kulturhus 't Grachthuys veur de vieftigste maol den jaorlijksen Dialektdag ehollene. Den dag wordt altie<sup>d</sup> organisaerd deur de Stichting Culturele Grenscontacten Achterhoek-Westmunsterland in samenwerking met o.a. den Dialektkring Achterhoek en Liemers. Elk jaor met een speciaal thema. Dit jaor was dat 'Renaissance van het Dialect?

Veur ne good gevulde zale, zonne honderd man was anwezig, gävven vijf inleiders hierovver eure mening, te wetten Gerrit Dannenberg van de Twente Akademie in Enschede. Alfred Janning oet Hegden, Kreisheimatpfleger van Borcken, Cornelia Nath oet Aurich van 't Plattdüütsbüro Ostfriesische Landschaft, Ulrich Backmann oet Munster, leider van de Fachstelle Niederdeutsche Sprachpflege van den Westfälischen Heimatbund en Diana Abbink, veurzitter van den Dialektkring Achterhoek en Liemers en met-initiatiefnemmer van de Achterhoekse organisatie Boezewind.

vertellen  
Veurafgaonde <sup>1</sup> Henk Krosenbrink hoo 't vieftig jaor elaeene allemaole begonnen was. 't Was een plan van den Kulturkreis Schloss Raesfeld met prof. dr. Stephan Selhorst en van den Dialektkring Achterhoek en Liemers met Geert Stork en Henk Krosenbrink. 't Doel was umme 't anzeen van de streektaal in 't grensgebeed op te krikken en metene umme dudelijk te maken, dat bi'j de streekcultuur de taal der bi'jheurt en verbindend warkt. 't Gōf makkelijke/kontakt dan Nederland of Hoogduuts.

Den aersten echten Dialektdag worden op 12 juni 1965 in Ahaus ehollene, waor professor Klass Heeroma praoten ovver 't thema Taalwille. Metene een good begin. Naodeen kwammen der allerhande thema's an de orde, zoas School en Dialkt, Dialekt en Religie en der worden epraot ovver streektaalliteratuur.

Noo op den vieftigsten dag kwam der natuurlijk gin kant en klaor antwoord oet op de vraoge of Dialekt momenteel ne Renaissance metmek. De belangstelling daorveur nömp dudelijk too bi'j bevolking en media, maor 't gebroek van de streektaal deur kindere löp hard achteroet. An beide kanten van de grenze.

De scholen mot dus bewarkt worden en daorveur is geld neudig. De overheden hebt in 1995 't Nedersaksisch wal as ~~daarke~~ taal erkend. Ne taal dee bescharmd ~~en~~ mot worden en instand ehollene. Maor geld hebt ze daorveur nog neet ovver.

Behalven in Ost-Friesland, waor ne professionele kracht--Cornelia Nath, genges is. Deur 't anstellen van ne vakkracht könt alle activiteiten worden ebundeld en oet-ebreid. Dat was dudelijk oet alle inleidingen. Anders blif 't bi'j good bedoelde en kleinschalige gebeurtenissen op streektaalgebeed.

't Was good umme op dizzen/dag alle zaken nog ins waer op de riego te zetten en te laoten heurn waor de problemen ligt. Laow hoppen, dat de paar politieke leu in de zale good hebt elasterd. Dee bepaolt 't beleid en gaot ovver 't geld. Plaannen bunt der genog, hef iederene können heurn.

Henk Krosenbrink.